

Ai sorestanti (per talian “superiori”) de diocesi di Udine

«TREDIS AGNS DOPO...»

Letare di un pôs di predis de classe 1965
in occasion de sornade pes vocations

“Se no us abade, disilu ‘e glesie...”

(Mt. 18, 17)

Dade dongje in Cjargne - ai 30 di novembar dal 1978 -

PREMESSE

O vin pensât a lunc prime di mandâ fûr cheste nestre letare, par viodi s'o vevin il dirit di judicâ i nestris sorestantis cui riscjo di fâ un pecjât di presunzion opûr di tasê, cul riscjo di fâ un pecjât di omission. O vin preferît dî clâr e tont ce ch'o pensavin su la conclave che messede la diocesi.

L'ocasion le vin cjapade de sornade pal seminari. Nus veis invidâts, ai 26 di novembrar, e fâ propagande pal seminari e pai "ministeris" (ancje vuâtris o veis cjapade la plèe taliane di ganbiâ nons cuanche no si rive odore di ganbiâ sostanse).

Poben, prime di fevelâur 'e nestre int dal predi, nus à parût un dovê di cussiese di cirî una rispuoste par nô e pe nestre glesie, ancje par no cjoli vie la int cun sflocjs.

Ai 7 di otubar dal 1952 o sin jentrâts in seminari a Cjastelîr. O erin passe setante. Tredis agns dopo, dai '65, o sin saltâts fûr de scjaipule in diseivot. Di chescj, doi il Signôr j à parût di cjòlsai cun sê ma, cognossinju come che ju vin cognossûts nô, o pensin che nus varessin dade reson amancul sul discôrs di fonde. O fevelin, partant, ancje par lôr, ch'a son tal mont dal vêr e che àn finide tant adore la lor sornade.

Dal '65 al '78, ch'o sin cumò, a son passâts âtris tredis agns: un âtri seminari, dut indifarent. O crodin, dopo tredis e tredis, di podê fâ un confront fra un seminari e chelâtri, fra il vuestri ch'o faseis propagande e chel de int, che us intaresse avonde pôc.

IL VUESTRI SEMINARI

In saressin tantis di dî sul vuestri seminari. Scomençant des virtûts teologâls jù jù fint 'e cussiense.

Su la fede no nus veis discorût nè judâts, parceche si veve di vêle per principi. Par chel nus veis discorût dome de "tecniche" de fede, vadì cemût ch'al ere fat Diu e cemût che si veve di stropâur la bocje ai resiatics e ai neutros ("errores").

Su la sperance nus veis insegnât che nond'ere problemas di sorte: Crist al veve imprometût che la glesie catoliche romane e ere antisismiche, pa la cuâl bastava dome stâ granpâts tôr di Rome par no lâ sot o falî. L'impuartant al ere ubidî simpri cence mai domandâsi il parcè, tanche i soldâts di Hitler. "Vir oboediens loquetur victorias".

Su la caritât, nus veis insegnât a butâ di bande famèe, sanguïnio, paîs e int per meti, impen, il cûr di Gjesù e il cûr di Marie.

Riguart 'e cussiense, nus veis insegnât che la cussiense no ere dome une, che si le veve o si ere cence, ma ch'and'ere di cuatri tipos e che si podeve sielgi fra une e cheâtre daûr ch'al pocave, seont i sistemis morâi dal '600. L'impuartant al ere, se mai, di fâle par sot, di no dâ scandul. Fâle e platâle, come il gjat. A glorie di Diu.

Chêi che nus àn imboconâts a scuele, pai curidôrs, tai confusionaris o tai lor sgabussâns, un pôs a son lâts a cjapâ il premi di vê pestât sù centenârs e centenârs di clerics bogns come il bon pan. Âtris a stan encjemò gjoldint il

premi in chest mont, tai centros plui impuantants de diocesi, stant ch'a saltavin fûr de sbrume dal predessam e ch'a vevin cjapade la lauree venti-jù là ch'a vivin di seculoruns cu le religjon. Âtris a son ancjmò in seminari, seben che clerics nond'è. E, veretât di Diu, no savin ce ch'a stan a fâ ancjmò il dentri! Ma chescj salocôr no son afârs nestris, ch'al è il vescul, il vice-veskul, il vice-vice-veskul e i membris del Soviet che si cjatin ogni lunis a decidi pal ben de glesie di Udin.

Chest par chel ch'al riguarder il vuestri seminari. O vin savût che cumò o veis scjarsetât. Cuanch'o erin nô, and'ere dibot un sîscent, tra e fra. "Stait atents ce ch'o faseis, che cumò and'è bondanse e us parin fûr in cuatri e cuatri vot!" nus à dit un professôr che dopo lu àn fat ancje bonsignôr.

An veis parâts fûr un disordin; chêi ch'a vevin plui cjâf e che us disevin che la robe no lave o chêi che no vevin cun ce pajâ o chêi ch'a stentavin a stâ in rie. Cumò o veis miserie e o vaïs. Come il cocodril. No nus faseis nissun dûl. O podevis tratâ miei chêi ch'e erin e cuanch'a erin. Amancul cumò us varessin fate propagande a favôr e no cuintre.

CHELÂTRI SEMINARI

E cumò, dopo di vê fevelât dal vuestri, lassajnus fevelâ di chelâtri seminari, chel che nus à tocjât di fâ. No fevelin dal plevan ch'al veve reson e dal capelan ch'al veve simpri tuart e si veve di ganbiâlu, e nancje dal nissun rispiet che àn vût pai biâts predessuts ch'a saltavin fûr ducj indurmidâts ma plens di buine volontât, ch'o veis fat di dut par disfreidânu. O fevelin de int.

Si sin cjatâts pastôrs (magari di seconde rie) di un popul che nissun no nus veve mai fevelât. A varessin podût mandânu a fâ il predi ancje a Orgosolo, ch'al ere compagn. Che difat, un lu àn mandât ju per Florence, chelâtri jù par Sece, âtris tre e àn passât il poç e a son lâts a finile venti-là pes Americhis. Come s'al fos stât compagn edentic fâ il predi tun puest o ta chelâtri. O savevin teologjie, liturgjie sociologjie, dret ejaluni, musiche gregoriane, morâl, catechistiche taliane e olandese ma il furlan no lu savevin. Al ere improibît fevelâ te nestre lenghe. Si visajso dal articul 100 dal vuestri regolament dât dongje cul jutori dal Spirtussant e cun tant di "gracie dal stât", che nus al fasevis copiâ ogni volte ch'o fevelavin te lenghe de int ch'o varessin vût di lâ a vivi cun lôr? Pitost di doprâ la nestre lenghe, une dî o seis rivâts jù cun tant di latin, cu la lenghe di Lefebvre, che cumò, a vacje vie, lu sclaponais parceche al à girât l'ajar disot.

Cheste int e veve une liturgjie e nissun no nus à mai vût indiment di nuje, dome un slac di provis par dî messe per talan. A vevin une storie e no nus e veis mai contade o le veis contade a mût vuestri. Nus veis menâts a ducj i santuaris de provincie par che la Madone nus tignis vuardâts dal femenàm, ma a Naquilée, te scune de nestre storie religjose e civil, no nus veis mai menâts.

Chest popul al ere un tic canostrel e nol ere propens in fat di sacraments e di fraternitis e di sociis, e vuâtris nus veis fats tignî sù dute cheste rabaldarìe di associazions che dopo a son ladis in nuje cence nancje la brie di butâlis abas.

Intant però, se ancje no eris clârs tai problemas di fede e di justissie, si savevis spiegâ benon su âtris cuistions: par esenpli tal votâ e fâ votâ pe DC, tal meti la petece par fâ lâ sù chêi che us levin a vuâtris, ancje s'a erin laris o disonescj o bogns di nuje. E cuanche un pôc a la volte o vin vierzût i vôi e o vin

capit che cussì no lave, vuâtris o veis dit che no si veve di fâ plui pulitiche, che no si veve di impaçâsi tes robis che no erin competents. Cussì chêi che prime a vevin fate dibot ancje la liste e segnât tes cjartis di maridâsi se un al ere çampin, dopo a vevin di tesê ancje se un popul intîr al vignive sassinât. Par no sei clericâi. Propit vuâtris che nus veis gjavât dut ce che di bon o vevin intôrsi come furlans par fâns clericâi e stazâns ducj compagns “dalle Alpi alle Piramidi”!

CUMO'

Naturalmentri, se vuâtris cumò o diseis che no seis colpe des robis sucedudis prime, ancje nô us rispuindarin che no us vin imprometude ubidiense a vuâtris, ma a di chêi di prin. Pa la cuâl us conven cjapâsi debits e credits.

Ce che plui nus dà di pensâ e nus fâs restâ malapajats, però, no son tant lis robis vieris, che chêis o ben o mât a son passadis, ma il mût che vuâtris sorestant ("Superiori") o messedais la paste cumò.

Dal '75 in ca a son sucedûts te nestre glesie fats unevore grancj e tremens e impuartants; lis sembleis dal clero, la cuistion de universât furlane e, piës di dut, il taramot, tant per restâ tal grant, che sui fats concrets an sares une letanie che no finis âtri.

Lis sembleis dai predis (massime la prime) a erin un at di coregio da part dal vescul e di sperance da part nestre. Si à discorût, si à cavilât, si à cirût di incjarnâ cheste nestre pastorâl tun mont e tun popul ch'a vevin une muse, une lenghe, une storie, un mût di vivi e di crodi ben précis. O vin ditis robis ch'o podarin tignisi in bon di vêlis ditis fin ch'o vivin. Poben, il vescul e la so conclave (le solite "voce di Dio") e àn tant saborât sot e sorevìe fin cuanche àn fat lâ in vacje dut ce ch'al ere stât dit e decidût.

Pe universât furlane, si erin impegnâts come predessam a lâ fint in fonts par che la nestre int no fos spodestide di un dirit di fonde par vivi e par vê un avignî. Cul jutori dai predis a son stadis cjapadis su lis 125.000 firmis e la int si visarà a lunc che i taulins a erin metûts fûr di messe, par dî che la messe e jè dentri e fûr e che la religion no à sevôr se no salte fûr di glesie come che no jè religion se no jentre dentri. Poben, cuanche i rapresentants pulitics nus àn imbrojâts e a àn cjolt pal cûl e tradît un popul marturizât, i sorestanti de diocesi e àn batût un telegram per domandâ comprehension. Cuanch'al ere di fâure pajâ, e àn tasût. Par no sei "clericâi", e àn preferît fâ la part di Pilato o di Gjude, seont la gnove teolighe curiâl e vescovîl.

Cul taramot, po', Di' nus vuardi! Dopo di vê dit, cun tune sigurece di fâ pore, che nol ere un ejastic di Diu, dopo des gimuladis e dai avôts a Madone di Mont e, cumò, cu la "marcialonga" di Vençon a Glemon, sito su dut il front. Ancje le samblée dei cristians e sta mandant in slâcare chel pôc o trop ch'a ere rivede a tirâ fûr di bon. Cualchidun, ch'al veve dit ch'al vares "alzata la voce", a son passe tre agns ch'al à la rauche. Ma no le à cjapade per vê berlât masse. Si è inrusinide la vôs a fuerce di tasê e di fâ puisiis teologjchis come se in chest moment che si decît le vite di un popul, si podes permetisi la massepassuderie di dî monadis par tignî sù une int che sta penant e che si sta ruvinansi.

A di chêi ch'a domandin sembleis, a rispuindin ch'a fasaran sinodos. Cuanche si domande clarece, a rispuindin metint sù une gnove cumission, par ch'a fasin confusion e ch'a cjapin lis colpis. Naturalmentri il mât nol è dome di

une bande, parceche se un al rive adore di parâ atôr dut il predessem, tocje ameti che ancje il predessam al è cojar.

UBIDÎ O DISUBIDÎ?

No sin pintûts di jessi predis e nancje di vê imprometude ubidiense. Però nus semèe che in tun moment come chest no si puedi tasê sun tune cuistion di fonde: esal di tasê o no? Di ubidî o, in non di Diu, di disubidî? E parcè?

Il seminari si è disvuedidât. A son restâts i predis, ma i clerics le àn tovade o no si son sintûts di jentrâ. Al è dibant tirâ fûr najnis che no tegnin e platas daûr de fumate des peraulis. La realtât e jè che nissun zovin no j ven voe di deventâ predi parceche al viôt che i predis a son jù di cuarde in ducj i sens. La vocazion e nas simpri di un spieli, di un'âtre vocazion. Ma vuè il reclam dai predis al fâs pocje furtune. I predis a son malcontents. Parceche a son maltratâts, malsigûrs e malorganizâts.

PASTORÂL A STRISSULIS

I predis vecjos a son tratâts piês che no i bintars dai paîs. Apene che un predi, ch'al à passade une vite tun paîs, j fâs presint al Soviet lis sos dificoltâts, i siei gredeis, il so aviliment tun mont cussì sunsurôs e ch'al gambie di un continuo, si aprofite dal moment par deliberâsi di lui, cence nissune justissie nè cussiense nè creance. An sares tencj ch'e restaressin ancjmò sul puest, baste che il vescul e la so gùbie j dessin un sclip di coragjo. Invezit j fasin capî o adiriture j disin su la muse ch'al è fûr di scuare, ch'al è a l'antighe, ch'al è miei che si tiri da bande parceche la religion e jè fûr di mode. Ch'al distrighi la place. Cuanche la place e sarà distrigade e il predi al sarà sgnacât tun ricovero o ca o là tanche un sigainar (cun tant di seminari vueit, comut e fitât ‘e scuele pubbliche!), cuanche i paisuts saran ducj cence predi, ve' la gnove scuvierte saltade fûr in chestis ultimis sflameadis curiâls: la pastorâl a strissulis, vadì “le zone pastorali”. No jè une novitât: un teritori al à tantis robis in cumunion: gjeografie, culumie, sistemis di vite, caratar de int, mût di ejapâ la religion e vie discorint. No savevin però che per chel si vessin di tirâ vie ducj i predis di chê zone per meti su une cumunitât a frari vie. Cu la difarense che i fraris, fra ejanelis, messis e contâ bêcs a parin vie il temp, ma chêi tre o cuatri vedras ch'a stan lî, in tun centro, ce stano a fâ? E i paîs des monz là che il predi al ere l'uniche e la ultime autoritat che podeve dâi una man ‘e int, no jèntrino propit nuje? Lui, siôr vescul, ch'al va atôr babant di caritât e di amôr di Diu e di prossin, parcè nus fasial chest damp di tirâ vie i predis dai paîs che coventin par metju là che no coventin? No ajal nissun venseli difarent dai pulitics che àn zà tirât vie scuelis, asilos e dut e ch'a fasin l'impuessibil par scancelâ borcs e paîs? Gjesù Crist al ere dut l'an atôr pai borcs e a Pasche al lave a Gjerusalerm. Chi si sta dut l'an a Gjerusalem e a Pasche, se si à voe, si va là che jè la biade int a sbrovâ une messe e a scjampâ di corse! Cun ce cûr larajal a fevelâur a di cheste int? Cui esal chel espert ch'j à metude tal ejâf una robe tant orende cuntri Diu e cuntri dai plui tibâts, ch'a son il prin spieli di Diu? Lui, se mai, al vares di fânus vignî gole di lâ e ufrî la nestre vite ta chescj puesej umanamentri bandonâts a no judânus a scianpâ.

DAL PAÎS ‘E CUMUNITÂ.

Chi in Friûl o vin la furtune di vê i paîs, ch'a son une autentiche cumunitât naturâl e cristiane. Cumò e jè vignude fûr le gnove sflocje, no savin se de Olande o dontri dal gjaul ch'a vegni, di ruvinâ, fruçâ, dividi la plêf per meti sù la cumunitât. Che à di sei comunitât “sacramental”, e à di decidi se si à di vescolâ o no. Sino deventâts mats? Là vêso il provin de fede per dî che un al è dentri o fûr de cumunitâ di chêi ch'a crodin? E chê biade int che labore di buinore fin sere e che jè strache e no à voe nè temp di pierdi a “interrogâsi” su la “testemoneance”, chêi no sono fîs di Diu? E se un al à gust di vê ancje un cjantonut par cont so par vivi la so religion, no ajal dirit? Vino coletivizât ancje il vanseli cumò? Une robe e jè proponi e une robe imponi. Âtri al è fevelâ di religion e di venseli e âtri al è rimpinâsi su la problematiche socio-esistenziâl-profetiche-comunitarie (viodeiso che te nestre lenghe nol va ben nancje di dî e mancul ancjemò di fâ?).

CUINTRI DAI PREDIS E DE INT

Riguart ai predis, o scugnìn dî un'âtre robe. Une volte la int no podeve viodi i predis e alore a erin i sorestanti ch'a paravin i predis denant de int ancje cuanch'a vevin tuart, a ûs una corporazion. Cumò o sin rivâts dut ledrôs: se un predi al à dibisugne di une man per vê justissie, par sei tratât di omp, al à di preâ il Signôr ch'j deti une man la int, che il vescul al sarà di sigûr cuntri di lui. E se in tun paîs la int e ûl chel predi, si pò scometi che lu tiraran vie. Se no lu vuelin, e cun mutîfs, il vescul lu lasse, par dispiet. Come tal câs des firmis cjapadis sù ca e là pal Friûl. S'a erin a pro dal vescul cuntri dal predi a valevin; s'a erin a favôr dal predi e cuntri de curie, no valevin. Là vêso imparede cheste logiche?

STADERIIS FALSIS

E sui spostaments dai predis? O tirais fûr la solite liende che nond'è. Vêso fat la tabele di chêi ch'a son a spas? E parcè comandaiso dome e di chêi biâts che us ubidissin o che o saveis di podêju cjapâ pal cuel (= ricatâju) tirant vie la scuele o la congrue? E cheste e seres comunioñ? Percè no meteiso tai paîs chêi ch'a son a slas, scomençant di chêi de curie e dal seminari? O vevin zà dit che i predis, par regule, e àn di sei tune plêf. Parcè no ju obleajso a lâ? E parcè, se cualchidun us domande di lâ tun paîs, a di chel no j deiso un puest? And'ese tante religion jù par Udin, ch'a son dibot dusinte predis? E ce ese dute cheste trajne ch'a rivin chenti ducj i vignedits e i vanzums di ducj i ordins e ur faseis un acèt tant biel che ai vuestris predis, ch'a vivin e a scombatin di simpri, nancje no si insumiais di fâ tant plait? E parcè faseiso tantis difarensis fra chêi ch'a lassin e chêi ch'a restin? No si sintìn di jentrâ in merit di chêi che s'in van: o podin ancje capiju, tant plui che o sin de impinion che il celibât e à di sei une sielte libere, di fâle pussibilmentri prime di deventâ predis. Ch'a seti cemût che ûl, al è simpri un fat personâl, che no jentrin in merit. Però no àn di lâ chêi de Curie a maridâ chêi ch'a bandonin e dopo, se si presente un di chêi ch'a restin, lu tratin come un ejan. No si trate di invidie, ma di justissie. Se si à di vê comprehension per un ch'al mole, no si àe di vê cussiense cun tun ch'al reste e ch'al vares ancje lui mutîfs per molâ compagn di cheâtris? Nus pâr che la staderie ch'o doprais e jè false. O podin ancje fâ nons.

CENCE TAMON

Strucant la nestre esperiense di tredis agns di predis, o podin dî che in Friûl al mancje il tamon tun moment ch'al covente plui di simpri. Il vescul nol ûl che i predis si cjatin in semblèe cumò ch'al covente cjatâsi per dâsi coragjo, par cjatâ una glagn di lâ indenant, par vê une linie pastorâl che deti justissie a di un popul ch'al à di tornâ sù tal cuarp e ta l'anime. E chest al ûl dî impegno catechistic, liturgic, musicâl, culturâl, pulitic, economic e dut ce ch'al interesse il nestri popul tal so destin ch'al è eterno ma ch'al scomence cajù. Vonde piuladis, vonde bausiis, vonde pachis su la spale, vonde vajuçadis, vonde dâj la colpe a di chel e chelâtri, vonde cumissions che no cumbinin redensie di nuje ma ch'a servissin dome di parevôi. I predis a son stuf, a rugnin sotvìe, a stan pierdint l'afiet e il gust pal lor mistîr di passi cheste nestre int. O domandin che si veti il coragjo, in non di Diu, di dî fûr la veretât nude e crude. Cence veretât al è un delit fevelâ di caritât.

LA “VOCE DI DIO”

O domandin cussiense, clarece, coragjo, fede e religion. Une religion che veti lis lidris te nostre esperiense di popul e no tai befêi che us rivin di Rome. Us domandin di no fruçâ chel sclip di religion che nus è restât. Lassàjnus crodi di furlans, rispietajnus come cristians, come predis e come omgs, ’o voleis che nô us rispietîn anje vuâtris. O pratindeis di sei la vôs di Diu. Poben, fintore chel Diu, ch'al vares di fevelâ a mieç vuestri, al à mostrât di sei un Diu avonde sclagn, bausâr, fufignadôr, injust, de bande dai grancj e dai prepotents e cuintrî de int. Un Diu che nol pò sei il Diu de Bibie e nancje il Diu ch'j vin ufierte la nestre vite cun dute la gjonde dai nestris vincjecuatri agns ai 29 di jugn dal 1965. E alore, secont vuâtris, varessino di ubidîus a vuâtris o a Lui.

No podin pratindi che vuâtris o bandonaïs la vuestre “religion” per nô, ma nancje nô no si sintîn di butâ vie la nestre vite par vuâtris e pes vuestris cumbinis “catolichis”.

Pa la cuâl o vin preferît cori il riscjo di no sei capîts di chêi ch'e ciraran simpri di capînus par ledrôs, pitost di vê su la cussiense il pês di no vê dit ce ch'o pensavin su chescj problemas de nestre glesie furlane ch'o sin contents di spindi la vite par jê. Al sarà ce che Diu orà.

Ai 30 di novenbar dal 1978 — Te fieste di sant'Andrèe apuestul

pre Antoni Beline, plevan di Val e Rualp e Treli